

Adroddiad ar yr Ymgynghoriad

Cyflwyniad a Chyd-destun

Ochr yn ochr â phob awdurdod lleol yng Nghymru, er mwyn cyflawni Dyletswydd Cydraddoldeb y Sector Cyhoeddus, mae Llywodraeth Cymru wedi nodi ei bod yn ofynnol i Gyngor Bwrdeistref Sirol Caerffili lunio Cynllun Cydraddoldeb Strategol ar gyfer 2020-2024. Mae angen ei gyhoeddi erbyn mis Ebrill 2020. Ysgrifennwyd y Cynllun er mwyn esbonio i'r staff, yr aelodau etholedig, y trigolion a'r rhanddeiliaid sut mae Cyngor Bwrdeistref Sirol Caerffili yn bwriadu cyflawni ei ymrwymadau cydraddoldeb gan barhau i fod yn sefydliad cynhwysol nad yw'n goddef gwahaniaethu o unrhyw fath.

Gan adeiladu ar ymrwymiad parhaus a gwaith blaenorol y Cyngor i gyflawni cydraddoldeb, cynhaliodd y Cyngor amrywiaeth o ymarferion casglu tystiolaeth a digwyddiadau ymgysylltu cyn ymgynghori er mwyn datblygu cynnwys y Cynllun Cydraddoldeb Strategol drafft a datblygu'r Amcanion Cydraddoldeb drafft mewn ffordd ystyrlon:

- Adolygiad o ofynion deddfwriaethol
- Adolygiad o adroddiadau a chanllawiau allanol gan y Comisiwn Cydraddoldeb a Hawliau Dynol
- Adolygiad o Gynllun Cydraddoldeb Strategol presennol y Cyngor a dogfennau a chanllawiau cysylltiedig
- Adolygiad o ymarferion ymgynghori blaenorol a gynhaliwyd gan y Cyngor mewn perthynas â materion cydraddoldeb
- Dadansoddiad o setiau data lleol a chenedlaethol
- Adolygiad o ddogfennau cydraddoldeb Llywodraeth Cymru ac awdurdodau lleol eraill
- Gwaith ymgysylltu â rheolwyr darparu gwasanaethau yn y Cyngor
- Trafodaethau â Chymdeithas Llywodraeth Leol Cymru, Llywodraeth Cymru ac awdurdodau lleol eraill ledled Cymru am faterion cydraddoldeb allweddol sy'n gysylltiedig ag amcanion cydraddoldeb cyfredol ac y gellid eu hystyried yn amcanion cydraddoldeb yn y dyfodol

Wedyn, cynhaliwyd cyfnod ymgynghori ffurfiol ar yr amcanion cydraddoldeb drafft yn y Cynllun.

Diben

Diben yr ymgynghoriad ffurfiol a gynhaliwyd oedd gofyn barn trigolion, aelodau etholedig, staff a rhanddeiliaid eraill ar yr amcanion drafft a amlinellir yn y Cynllun Cydraddoldeb Strategol drafft a nodi'r camau gweithredu mwyaf priodol er mwyn helpu'r Cyngor i

gyflawni'r amcanion hynny, ar ôl cytuno arnynt. Bydd y dull gweithredu hwn yn helpu i nodi camau gweithredu ystyrlon yn seiliedig ar anghenion a nodwyd ac mae'n unol â dull gweithredu Llywodraeth Cymru.

Yn benodol, gofynnodd yr ymgynghoriad i ymatebwyr gyflwyno sylwadau mewn perthynas â phob un o'r amcanion drafft fel y'u hamlinellir isod:

1. Deall a dileu'r rhwystrau y mae pobl yn eu hwynebu wrth gyrchu gwasanaethau
2. Gwella cyfleoedd addysg i bawb
3. Hybu a hwyluso cymunedau cynhwysol a chydlynol
4. Ymgysylltu ag aelodau o'r gymuned er mwyn iddynt gymryd rhan a lleisio barn wrth gynllunio darpariaeth gwasanaethau
5. Sicrhau y gall y cyhoedd sy'n siarad Cymraeg gael mynediad i wasanaethau sy'n cydymffurfio â'r gofynion statudol
6. Creu gweithlu sy'n adlewyrchu ac yn parchu amrywiaeth y cymunedau yn y fwrdeistref sirol
7. Lleihau'r Bwlch Cyflog rhwng y Rhywiau

Gofynnwyd am sylwadau o ran a fydd yr amcanion a amlinellwyd yn helpu'r Cyngor i leihau anghydraddoldeb yn y gweithlu a chynorthwyo o ran cyflenwi gwasanaethau a sicrhau mynediad at wasanaethau. Lle roedd ymatebwyr yn anghytuno ag unrhyw un o'r amcanion, gofynnwyd iddynt roi rhesymau dros eu barn. Gofynnodd yr ymgynghoriad hefyd i ymatebwyr nodi unrhyw feysydd anghydraddoldeb na chawsant eu cynnwys yn yr amcanion a gynigiwyd ac wedyn i nodi camau allweddol y dylai'r Cyngor eu cymryd er mwyn sicrhau ein bod yn lleihau anghydraddoldeb yn y gweithlu a chynorthwyo o ran cyflenwi gwasanaethau a sicrhau mynediad at wasanaethau. Gofynnwyd i ymatebwyr hefyd p'un a oedd eu hymateb i'r ymgynghoriad wedi'i ddylanwadu gan unrhyw rai o'r nodweddion gwarchodedig, gan y gallai hyn gael effaith ar yr ymatebion a roddwyd.

Methodoleg (Yr hyn a wnaethom)

Cynhaliwyd yr ymgynghoriad ffurfiol dros gyfnod o 4 wythnos o 11 Tachwedd 2019 hyd at 6 Rhagfyr 2019.

Gellir gweld y dogfennau ategol a ddefnyddiwyd fel rhan o'r ymgynghoriad yn **Atodiad 1**.

- [Is-atodiad 1a - Crynodeb o'r Cyd-destun a'r Amcanion Strategol](#)
- [Is-atodiad 1b - Fersiwn hawdd ei deall](#)
- [Is-atodiad 1c - Holiadur](#)
- [Is-atodiad 1d - Cyflwyniad a ddefnyddiwyd yn ystod cyfarfodydd ymgynghori wyneb-ynwyneb](#)

Er mwyn galluogi pawb a oedd yn awyddus i gyflwyno barn i gymryd rhan, roedd holl ddogfennau'r ymgynghoriad ar gael yn ddwyieithog ac mewn amrywiaeth o fformatau, gan

gynnwys fersiwn hawdd ei deall a fersiwn print bras. Rhoddwyd cyhoeddusrwydd i'r ymgynghoriad mewn amrywiaeth o ffyrdd ac roedd ar gael ar amrywiaeth o lwyfannau. Holiadur oedd y prif ddull ymgynghori a ddefnyddiwyd, ond anogwyd cyfranogwyr i ymateb mewn nifer o ffyrdd. Cynhaliwyd cyfarfodydd ymgynghori wyneb-yn-wyneb â grwpiau oedd â diddordeb penodol yn yr ymgynghoriad hwn ac sy'n anos eu cyrraedd drwy ddulliau ymgynghori eraill.

Staff ac Aelodau Etholedig

Rhoddwyd cyhoeddusrwydd i'r ymgynghoriad yn fewnol i'r aelodau etholedig ac i gyflogaeion:

- drwy negeseuon e-bost
- Rheolwyr Gwasanaethau drwy'r Rhwydwaith Rheolwyr
- drwy dudalen mewnwyd y Cyngor
- dosbarthwyd fersiynau papur i staff nad ydynt yn gweithio mewn swyddfa lle y gofynnwyd am fersiynau o'r fath

Grwpiau rhanddeiliaid

Dosbarthwyd manylion am yr ymgynghoriad a sut i gymryd rhan yn helaeth i'r canlynol:

- sefydliadau lleol a rhanbarthol â diddordeb mewn materion cydraddoldeb a sefydliadau partner lleol yn y sector cyhoeddus drwy restrau dosbarthu e-bost er mwyn rhadru'r wybodaeth ymhellach
- sefydliadau lleol yn y trydydd sector drwy Gymdeithas Cyrff Gwirfoddol Gwent (GAVO) er mwyn dosbarthu'r wybodaeth ymhellach
- cyngorau tref a chymuned lleol drwy e-bost. Cynhaliodd pob cyngor tref a chymuned gyfarfod yn ystod y cyfnod ymgynghori neu'n fuan ar ôl y cyfnod hwnnw
- cysylltwyd ag aelodau Panel Safbwynt Caerffili, Caerphilly People First, y Swyddog Cydlyniant Cymunedol Rhanbarthol, Menter Iaith Caerffili, Disability Can Do, Fforwm 50+ Caerffili, Umbrella Cymru, Stonewall Cymru, Anabledd Cymru, Deaf-Friendly a Gwasanaeth Ieuenctid a Grŵp Ieuenctid Pobl Lesbïaidd, Hoyw, Deurywiol a

Thrawsrywiol Bwrdeistref Sirol Caerffili drwy e-bost i'w hannog i gymryd rhan. Er mwyn cynnig y cyfle i gael adborth manwl, cynhaliwyd grwpiau ffocws wyneb-yn-wyneb â'r canlynol:

Caerphilly People First

Aeth aelodau o staff y tîm Cydraddoldeb i gyfarfod sirol Caerphilly People First yn ei swyddfeydd ym Margod ar 26 Tachwedd 2019. Gwnaed cyflwyniad i'r grŵp a gofynnwyd am sylwadau gan y cyfranogwyr mewn perthynas â phob un o'r amcanion cydraddoldeb drafft.

Rhwydwaith Rhieni Caerffili

Aeth aelodau o'r tîm Cydraddoldeb i'r ddau gyfarfod â grwpiau Gelligaer a Thredegar Newydd ar 3 Rhagfyr 2019. Darparwyd manylion y cyflwyniad ar ffurf taflen a chafodd aelodau'r grŵp eu tywys drwy drafodaeth am yr amcanion cydraddoldeb arfaethedig.

Cymuned Fyddar Caerffili

Yn ystod y cyfnod ymgynghori, cyfarfu hwylusydd Iaith Arwyddion Prydain â phobl Fyddar ledled y fwrdeistref sirol, gan ofyn am eu sylwadau ar y cynllun drafft. Wedyn, darparwyd ymateb ysgrifenedig yn crynhoi eu sylwadau i'r Cyngor.

Disability Can Do

Ar ran y Cyngor, cynhaliodd Disability Can Do dair sesiwn â'r canlynol:

- **Caffi Dementia Gyfeillgar yn Neuadd Eglwys Santes Gwladys, Bargod**
- **Grŵp Iechyd Meddwl yn Swyddfeydd Platfform, Oakwood**
- **Clwb Golwg yn Neuadd Gymuned Tre-lyn.**

Ni fyddai llawer o'r rheini y cysylltwyd â nhw wedi gallu cwblhau'r arolwg ar-lein.

Trigolion a'r gynulleidfa ehangach

Er mwyn cyrraedd cynulleidfa mor eang â phosibl,

- tynnwyd sylw at yr ymgynghoriad ar hafan gwefan y Cyngor, gan gynnwys dolenn uniongyrchol i ddogfennaeth yr ymgynghoriad ac arolwg ar-lein. Roedd fersiwn bapur o'r arolwg ar gael hefyd i'w argraffu o'r wefan neu mewn amrywiaeth o fformatau ar gais.
- rhannwyd manylion yr ymgynghoriad drwy ffrwd Twitter a thudalen Facebook y Cyngor. Cyrhaeddodd y wybodaeth ar Facebook 4,173 o bobl a chysylltodd 187 ohonynt o ganlyniad.
- lluniwyd datganiad i'r wasg ar gyfer y cyfryngau lleol ac fe'i rhannwyd ar wefan y Cyngor.

Canlyniadau Ymatebion a phroffil yr ymatebwyr

Cwblhaodd cyfanswm o 15 o ymatebwyr yr holiadur ar-lein. O'u plith, dim ond dau berson oedd o dan 50 oed. Roedd gan hanner y rheini a gwblhaodd yr arolwg anabledd, roedd dwy ran o dair yn fenywod a nododd pob un eu bod yn wyn o ran tarddiad ethnig ac mai Saesneg oedd eu prif iaith. Nododd nifer o'r rheini a ymatebodd i'r ymgynghoriad fod ganddynt brofiad uniongyrchol o faterion cydraddoldeb.

Yn ogystal, cafwyd tri ymateb ysgrifenedig, un gan gynrychiolwyr o'r gymuned Fyddar, un gan gynghorydd lleol ac un gan drigolyn lleol.

Daeth cyfanswm o 12 aelod o Rwydwaith Rhieni Caerffili i'r trafodaethau a gynhaliwyd fel rhan o'r grŵp ffocws wyneb-yn-wyneb. Roeddent wedi'u rhannu rhwng dau grŵp ar wahân (5 cyfranogwr yng Ngelligaer a 7 cyfranogwr yn Nhredegar Newydd). Roedd pob un ohonynt yn fenywod ac roedd dwy ohonynt yn neiniau.

Yng nghyfarfod Caerphilly People First, roedd 20 o bobl ag anableddau dysgu yr oedd 13 ohonynt yn ddynion a 7 yn fenywod. Roedd y person ifancaf yn y cyfarfod yn 22 oed ac roedd yr hynaf yn 78 oed.

Fel rhan o'r sesiynau grŵp a gynhaliwyd gan Disability Can Do, cymerodd cyfanswm o 38 o bobl ag anableddau ac 18 o ofalwyr neu weithwyr cymorth ran yn y tri grŵp. Roedd y rheini ag anableddau rhwng 40 a 60 oed ac roedd y rhan fwyaf ohonynt yn bobl hŷn.

Er i ni ymdrechu i ymgysylltu â phob sector o'r gymuned, mae'n amlwg na chafwyd unrhyw ymatebion gan unigolion sy'n cynrychioli grwpiau crefyddol lleol na'r gymuned pobl dduon a lleiafrifoedd ethnig.

Sylwadau'r ymatebwyr a themâu a ddaeth i'r amlwg

Tynnodd yr ymatebion i'r ymgynghoriad sylw at nifer o themâu cyffredin yn ogystal â materion a rhwystrau penodol mewn perthynas â'r amcanion drafft a amlinellwyd.

Ceir crynodeb o'r ymatebion a gafwyd yn **Atodiad 2**:

- a) Crynodeb o'r ymatebion i'r arolwg a luniwyd gan SNAP
- b) Nodiadau o'r trafodaethau grŵp
- c) Cylchlythyr Caerphilly People First
- d) Ymatebion ysgrifenedig a gafwyd
 - a. Y gymuned fyddar
 - b. Y Cynghorydd James Pritchard
 - c. Ymateb gan drigolyn
- e) Ymateb gan Disability Can Do

Rydym wedi cynnwys yr Amcan Cydraddoldeb a'r Cam Gweithredu perthnasol ochr yn ochr â'r adborth sy'n dilyn er mwyn dangos sut mae sylwadau'r ymgynghoreion wedi llywio rhai o'r camau gweithredu.

Cyd-destun

Roedd y rheini a ymatebodd i'r ymgynghoriad yn cydnabod bod angen i'r Cyngor roi blaenoriaeth uchel i Gydraddoldeb. Er nad oedd yn ystadegol ddilys gan mai nifer bach o ymatebion a gafwyd, roedd y rheini a ymatebodd yn cytuno bod yr amcanion a amlinellwyd yn berthnasol. Pwysigrwydd sicrhau bod camau gweithredu mesuradwy ag amserlenni clir yn gysylltiedig â phob amcan ac y caiff cynnydd tuag at y camau gweithredu hyn ei fonitro.

Amcan 1: Deall a dileu'r rhwystrau y mae pobl yn eu hwynebu wrth gyrchu gwasanaethau

Rhwystrau a nodwyd:

- Diffyg dealltwriaeth o'r ffordd y mae'r Cyngor yn gweithredu, pa wasanaethau a gaiff eu darparu a sut – yn aml nid yw pobl yn gwybod am y gwasanaethau/cyfleoedd addysg a hyfforddiant sydd ar gael iddynt
- Er bod opsiynau digidol yn ddefnyddiol i lawer, nid ydynt yn addas i bawb, yn enwedig pobl hŷn ac oedolion ag anableddau dysgu
- Mae llyfrgelloedd (a gwasanaethau cwsmeriaid) yn holl bwysig o ran cynnig cyswllt wyneb-yn-wyneb ac adnoddau i gymunedau lleol, yn enwedig rhieni â phlant ifanc a phobl hŷn
- Ystyriwyd bod diffyg mynediad at drafnidiaeth gyhoeddus ddibynadwy yn atal pobl rhag defnyddio gwasanaethau a'i fod yn effeithio ar y cymunedau mwyaf anghysbell a'r trigolion mwyaf agored i niwed yn y cymunedau hynny. Mae rhai yn teimlo'n unig iawn gan fod cyfleusterau lleol yn cael eu dileu heb unrhyw ffordd o gyrraedd gwasanaethau ymhellach i ffwrdd
- Gall mynediad ffisegol fod yn rhwystr (mae meysydd cyfrifoldeb y Cyngor yn hyn o beth yn cynnwys cynnal a chadw arwynebau palmentydd, cynnal a chadw coed a goleuadau stryd)
- Ystyrir bod diffyg dealltwriaeth o anableddau, problemau iechyd meddwl a meysydd cydraddoldeb eraill yn rhwystr

Beth mae pobl yn meddwl y dylem ei wneud:

- Dylid darparu gwybodaeth mewn fformatau ac ieithoedd gwahanol (gan gynnwys iaith Arwyddion Prydain) er mwyn sicrhau ei bod yn hygyrch i bawb. Mae hyn yn arbennig o bwysig mewn perthynas â gwasanaethau allweddol y Cyngor (e.e. sbwriel ac ailgylchu) ac nid dim ond gwasanaethau wedi'u targedu o fewn yr adran Gwasanaethau Cymdeithasol (*Amcan Cydraddoldeb 1 – Cam Gweithredu 3*)
- Dylid cynnig hyfforddiant cydraddoldeb ac amrywiaeth i gyflogaeth y Cyngor (*Amcan Cydraddoldeb 3 – Cam Gweithredu 2*)

Ni chafwyd unrhyw sylwadau pellach yn ystod yr ymgynghoriad mewn perthynas â'r amcan hwn.

Amcan 2: Gwella cyfleoedd addysg i bawb

- Sicrhau bod addysg yn un o flaenoriaethau'r Cyngor er mwyn sicrhau y caiff pob disgybl y cyfle i ddysgu mewn amgylchedd cydlynol
- Yr angen i sicrhau digon o gymorth addysgol i'r rheini ag anghenion dysgu ychwanegol ac i ystyried effaith y Bil Anghenion Dysgu Ychwanegol
- Yr angen i wella cyfleoedd cyflogaeth i'r rheini ag anableddau, gan gynnwys oedolion awtistig a'r rheini ag anableddau dysgu
- Cynyddu cyfranogiad drwy ddileu rhwystrau a sicrhau bod cyfleoedd yn diwallu anghenion/addas at ddiddordebau trigolion

Beth mae pobl yn meddwl y dylem ei wneud:

- Er mwyn gwella cyfleoedd addysgol, mae angen deall yr anawsterau y mae pobl ag anableddau yn eu hwynebu wrth ddod o hyd i swyddi a'u cadw a'r effaith y gall newid amgylchiadau o ran swydd ei chael ar fywydau pobl ag anableddau

Ni chafwyd unrhyw sylwadau pellach yn ystod yr ymgynghoriad mewn perthynas â'r amcan hwn.

Amcan 3: Hybu a hwyluso cymunedau cynhwysol a chydlynol

- Ar y cyfan, mae'r rheini a gymerodd ran yn yr ymgynghoriad yn teimlo'n ddiogel a'u bod wedi'u cynnwys yn eu cymunedau, er y nododd y rheini â chyflyrau corfforol a chyflyrau iechyd meddwl eu bod wedi profi achosion o wahaniaethu
- Mae gan yr Aelodau Etholedig ran i'w chwarae wrth annog cydlyniant cymunedol
- Mae angen cydnabod rôl bwysig y sector gwirfoddol wrth hwyluso cydlyniant cymunedol yn llawn

Beth mae pobl yn meddwl y dylem ei wneud:

- Cynnig hyfforddiant i'r staff er mwyn gwella ymwybyddiaeth o faterion cydraddoldeb a'r Gymraeg fel y gellir grymuso staff i nodi achosion o wahaniaethu a stereoteipio a mynd i'r afael â nhw (*Amcan Cydraddoldeb 3 – Cam Gweithredu 2*)
- Gweithio gyda sefydliadau yn y trydydd sector er mwyn nodi ffyrdd y gallwn gydweithio i gyflawni ein dyletswyddau o ran cydraddoldeb (*Amcan Cydraddoldeb 3 – Cam Gweithredu 4*)

Ni chafwyd unrhyw sylwadau pellach yn ystod yr ymgynghoriad mewn perthynas â'r amcan hwn.

Amcan 4: Ymgysylltu ag aelodau o'r gymuned er mwyn iddynt gymryd rhan a lleisio barn wrth gynllunio darpariaeth gwasanaethau

- Dylai ystyried materion Cydraddoldeb fod yn ffactor allweddol wrth wneud penderfyniadau mewn perthynas â datblygu a newid gwasanaethau. Mae cynnal Asesiad trylwyr o'r Effaith ar Gydraddoldeb ac ymgynghori'n briodol yn rhan annatod o'r broses hon
- Gall cymunedau gwybodus ymgysylltu'n fwy effeithiol felly mae cyfathrebu yn allweddol. Mae angen i ddulliau cyfathrebu fod yn briodol ar gyfer pob cynulleidfa ac ystyriwyd bod digwyddiadau ymgysylltu wyneb-yn-wyneb yn bwysig iawn i'r rheini sy'n cymryd rhan
- Mae angen i ni ymgysylltu â'n cymunedau mewn ffordd *ystyrlon* (wyneb-yn-wyneb) yn hytrach nag ymdrin â materion cydraddoldeb mewn ffordd arwynebol
- Mae angen i ni roi adborth i'n cymunedau er mwyn sicrhau eu bod yn gwybod sut y caiff eu sylwadau eu hystyried ac er mwyn eu grymuso i gymryd mwy o ran

- Wrth ystyried anghenion un grŵp gwarchodedig, dylid sicrhau na chaiff hyn effaith negyddol ar grwpiau gwarchodedig eraill
- Sicrhau ein bod yn defnyddio ffynonellau data lleol i ddatgelu patrymau anghydraddoldeb y gellir ymdrin â nhw
- Mae angen i ni ymgysylltu â staff ar bob lefel yn y sefydliad gan eu bod yn allweddol wrth sicrhau y caiff gwasanaethau eu cyfleu a'u darparu'n effeithiol i drigolion a defnyddwyr gwasanaethau

Beth mae pobl yn meddwl y dylem ei wneud:

- Adolygu ac atgyfnerthu prosesau mewnol ar gyfer cynnal Asesiadau o'r Effaith ar Gydraddoldeb a gwaith ymgynghori cysylltiedig (*Amcan Cydraddoldeb 4 – Cam Gweithredu 7*)
- Sicrhau y caiff ymatebwyr a'r gymuned ehangach eu hysbysu'n rheolaidd am gynnydd y Cynllun ac ymgynghoriadau eraill a gynhelir

Amcan 5: Sicrhau y gall y cyhoedd sy'n siarad Cymraeg gael mynediad i wasanaethau sy'n cydymffurfio â'r gofynion statudol

- Er nad oedd yn uniongyrchol berthnasol i'r cyfranogwyr, roeddent yn cydnabod bod cynnydd yn nifer y siaradwyr Cymraeg ifancach yn golygu y bydd yr amcan hwn yn fwyfwy pwysig yn y dyfodol

Beth mae pobl yn meddwl y dylem ei wneud:

- Mae angen i'r Cyngor sicrhau bod y broses o ddatblygu'r ddarpariaeth addysg cyfrwng Cymraeg yn parhau'n flaenoriaeth

Ni chafwyd unrhyw sylwadau pellach yn ystod yr ymgynghoriad mewn perthynas â'r amcan hwn.

Amcanion 6 a 7: Creu gweithlu sy'n adlewyrchu ac yn parchu amrywiaeth y cymunedau yn y fwrdeistref sirol a Lleihau'r Bwlch Cyflog rhwng y Rhywiau

- Er bod y rheini a ymatebodd i'r ymgynghoriad yn ystyried bod yr amcanion hyn yn bwysig, cydnabuwyd eu bod yn faterion cymhleth ac y dylai'r Cyngor arwain unrhyw waith cysylltiedig
- Dylid adlewyrchu amrywiaeth yn y gweithlu ac ymhlith yr Aelodau Etholedig

Beth mae pobl yn meddwl y dylem ei wneud:

- Dylai'r Cyngor chwarae rhan arweiniol wrth nodi'r rhesymau dros y bwlch cyflog rhwng y rhywiau a gweithio gydag eraill (yn enwedig Llywodraeth Cymru) i nodi cynigion o ran sut i leihau'r bwlch cyflog rhwng y rhywiau

Ni chafwyd unrhyw sylwadau pellach yn ystod yr ymgynghoriad mewn perthynas â'r amcanion hyn

A oes unrhyw beth ar goll yn y Cynllun drafft?

- Sicrhau bod yr Aelodau Etholedig yn meithrin ymwybyddiaeth o faterion cydraddoldeb a sicrhau bod eglurder ynghylch rôl yr Aelodau Etholedig wrth helpu i gyflawni mewn perthynas â materion cydraddoldeb (*Amcan Cydraddoldeb 3 – Cam Gweithredu 2*)

Y camau nesaf

Caiff canlyniadau'r ymgynghoriad eu hystyried ochr yn ochr ag adborth gan staff a rheolwyr gwasanaethau a byddant yn helpu i lywio fersiwn ddiwygiedig o Gynllun Cydraddoldeb Strategol y Cyngor ar gyfer 2020-2024 cyn iddo gael ei gymeradwyo a'i fabwysiadu ym mis Ebrill 2020. Caiff y camau gweithredu a nodwyd fel rhan o'r ymgynghoriad eu cynnwys yn y Cynllun Cydraddoldeb Strategol terfynol.

Is atodiad 2: Crynodeb o'r sylwadau

Cafodd y sylwadau eu golygu er mwyn sicrhau na ellir adnabod ymatebwyr unigol

[Is-atodiad 2a CCS Crynodeb yr Arolwg 11.12.19](#)

[Is-atodiad 2b Ymgynghoriad CCS – Nodiadau Rhwydwaith Rhieni Tredegar Newydd](#)

[Is-atodiad 2b Ymgynghoriad CCS – Nodiadau Rhwydwaith Rhieni Gelligaer](#)

[Is-atodiad 2b Ymgynghoriad CCS – Nodiadau Caerphilly People First](#)

[Is-atodiad 2c Ymgynghoriad CCS – Cylchlythyr Caerphilly People First](#)

[Is-atodiad 2d Ymgynghoriad CCS – Ymateb Cyng Pritchard](#)

[Is-atodiad 2d Ymgynghoriad CCS – Ymateb y Gymuned Byddar](#)

[Is-atodiad 2d Ymgynghoriad CCS – Ymateb Trigolyn](#)

[Is-atodiad 2e Ymgynghoriad CCS – Ymateb Disability CandDo](#)